



Sesida dals

Communitgà ils

Protocol nr.

19 da december 2023

20 da december 2023

1004/2023

Incumbensa da la fracziun da la PPS

concernent la promoziun da datas administrativas avertas
(emprim sutsegnader Koch)

Resposta da la Regenza

Ils 8 d'avust 2023 ha la Regenza approvà la «Strategia Administraziun digitala Grischun 2024–2028». Questa strategia duai accelerar considerablmain la digitalisaziun da l'administraziun chantunala. Per realisar la strategia ha il Cussegl grond approvà en la sessiun da december 2023 in credit d'impegn general brut da 35 milliuns francs. Ultra da quai ha el exceptà da la directiva da la politica da finanzas nr. 6 concernent la summa dals salaris, ch'i vegnan stgaffidas totalmain 45,6 plazzas a temp cumplain. Tut en tut 2 plazzas a temp cumplain e 0,4 milliuns franc èn previs tenor il plan da la realisaziun e dals meds da la strategia per sviluppar las datas publicas avertas (OGD) en l'administraziun chantunala.

Sin basa da l'incumbensa da la fracziun da la PPS concernent promover pli fitg datas administrativas avertas, ch'il Cussegl grond ha acceptà en la sessiun da zercladur 2020, ha la Chanzlia chantunala elavurà en collavuraziun cun l'Uffizi per economia e turissem (UET), cun l'Uffizi d'agricultura e da geoinformaziun (UAG) e cun l'Uffizi per la natira e l'ambient (UNA) ina varianta realisabla per derasar pli svelt OGD en l'administraziun chantunala. Tenor questa proposta duai la partiziun Statistica e registers dal UET esser responsabla per coordinar e per organisar OGD sin plaun chantunal. En il rom da la realisaziun da la Strategia Administraziun digitala Grischun 2024–2028 vegnan elavuradas las basas organisatoricas, persunalas e tecnicas per preparar e per utilisar las datas administrativas en l'avegnir en ina furma ch'è legibla electronicamain.

Cun questa incumbensa da fracziun vegn la Regenza incaricada da stgaffir la basa, per ch'il chantun possa promover cun contribuziuns la preparaziun da datas e l'utilisaziun dad OGD tras terzs.

En il sector dad OGD ha il chantun l'incumbensa da metter a disposiziun las datas administrativas ch'èn utilisablas libramain en ina furma adattada a la publicitad. Per quest intent vegnan impundidas resursas persunalas e finanzialas. I vegn furnì in servetsch, dal qual terzs pon profitar gratuitamain, perquai ch'ins po spetgar effects per l'economia publica. L'ulteriura utilisaziun resp. la preparaziun da las datas per intents economics e scientifics u per auters intents è dentant chaussa dals terzs interessads. Cun la Lescha per promover il svilup economic en il chantun Grischun (LSE; DG 932.100) e cun la Lescha davart la promoziun da la transfurmaziun digitala en il Grischun (LTD; DG 960.100) ha il chantun plinavant gia ina basa legala suffizienta per promover projects innovativs e/u digitals che pon er star en connex cun OGD. La premissa è ch'ils criteris da promoziun legals sajan ademplids. Perquai desista la Regenza da stgaffir ulteriuras pussaivladads da promoziun, en spezial perquai ch'il causal da promoziun duai cumpigliar sulettamain la preparaziun, la preschentaziun e l'utilisaziun dad OGD. Sco menziunà vegn la Regenza dentant a pussibilitar la preparaziun da datas sco er l'utilisaziun dad OGD tras terzs, quai en il rom da las pussaivladads da promoziun existentas resp. dals criteris da promoziun vertents.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Peter Peyer

Il chancelier:

Daniel Spadin